

Qalam

134, Rabī‘ al-Awwal 1381, September 1961, 60 sen

Perhatian kepada Alim Ulama

Dalam kejadian-kejadian yang berlaku di dalam perkembangan persuratan di Tanah Melayu telah zahir dengan nyatanya bahawa ada golongan-golongan yang besar kerjanya mempengaruhi masyarakat dijadikan alat oleh sesuatu golongan yang tertentu yang mendasarkan perjuangannya kepada pengertian *Socialist* yang tentunya lebih mengutamakan pengertian mereka dengan fahaman yang tidak bertuhan – tidak mempercayai adanya Tuhan.

Untuk merebut kekuasaan maka berbagai-bagai alat dan cara digunakan mereka. Kepada kita umat Melayu yang beragama Islam, agama itulah yang dijadikan mereka sasaran untuk dihapuskan di dalam hati sanubari kita. Untuk melaksanakan ini, mereka gunakan orang-orang yang boleh menggunting di dalam lipatan – yang di dalam perkataan agama, orang-orang munafik. Orang-orang ini kalau berjuang nampaknya terus berjuang kerana membela dan memperbaharui pengertian beragama tetapi hakikatnya adalah bekerja untuk menghancur leburkan persatuan umat Islam seluruhnya.

Cuba kita perhatikan bersama-sama dalam perkara ini. Alim ulama adalah menjadi sasaran yang tidak berhenti-hentinya daripada mereka. Alim ulama diserang sebagai pembawa fahaman kolot – pengertian beragama mereka sebagai orang-orang yang sesat. Karangan-karangan mereka adalah panjang berjela-jela dan berbagai-bagi lagi. Tidak sedikit pun yang ada diberi kepada mereka kenang-kenangan atas jasa-jasa mereka.

Apakah tujuan ini? Tidak lain supaya masyarakat benci kepada mereka, menjauhkan diri daripadanya – jauh daripada menerima pengajaran daripadanya. Langkah-langkah ini menanam perpecahan atau sengaja menimbulkan perasaan-perasaan benci terutamanya di atas mereka yang kurang pengertiannya dalam agama.

Dengan timbulnya perasaan ini maka anak-anak kita akan jauhlah daripada mereka. Mereka menyangka bahawa alim ulama adalah penghalang kepada kemajuan – penghalang di dalam segala-galanya. Dengan hidupnya semangat ini maka tidaklah akan diharap anak-anak kita itu akan dapat mempelajari agamanya dengan mendalam – bahkan banyak kelak yang sesat kerana hanya berpandu kepada semata-mata dengan buku-buku atau kitab-kitab sahaja dengan tidak mempelajarinya kepada guru. Ketidakpuasan hati terhadap alim ulama inilah yang menjadi sebab timbulnya orang-orang yang tidak percaya akan adanya Tuhan! Mereka hidup namanya sahaja Islam – nikah kahwin Islam tetapi jiwanya tidak lagi mempercayai adanya Tuhan.

Di dalam segi yang lain pula, mereka mengetahui bahawa di dalam perkembangan siyasah negara di tanah air kita, alim ulama banyak mengambil bahagian yang penting. Kerana itu mereka mencari jalan untuk meruntuhkan ini dengan menimbulkan kebencian-kebencian umum kepada mereka. Buruk sahaja alim ulama itu yang disebut padahal alim ulama itu telah banyak jasanya di dalam perkembangan masyarakat di tanah air.

Cubalah perhati; pada masa penjajahan dahulu timbul pejuang-pejuang tanah air umumnya daripada orang-orang yang dididik oleh alim ulama. Alim ulama yang banyak bekerja dan beramal menimbulkan semangat membebaskan diri daripada penjajahan sedang mereka-mereka yang berpelajaran Barat masa itu jadi anak emas penjajahan. Apakah boleh dinafikan jasa mereka di dalam perkembangan ini?

Selain itu, jika tidaklah kerana alim ulama maka tentulah tidak ada orang-orang yang sujud menyembah Tuhan. Banyak jasa dan pengorbanan yang mereka buat. Namun semua ini dilupakan dan didiamkan tetapi masyarakat diracun dengan

menimbulkan perasaan-perasaan benci kepada mereka. Mereka tanam perasaan kebencian itu sedalam-dalamnya supaya mereka senang mempengaruhi rakyat mengikut jalan dan tujuan mereka.

Untuk pelaksanaan ini mereka gunakan orang-orang yang boleh berkata “*Qāla Allāhu Ta ‘ālā*” yang masih mentah yang hanya tahu berkata tetapi tidak beramat. Mereka dengan lantam memburuk-burukkan alim ulama sebagai alat fahaman-fahaman anti-Tuhan untuk meruntuhkan kekuatan dan keyakinan orang beragama.

Dengan sebab itu maka berhati-hatilah kita. Orang-orang awam sekarang sudah mengerti akan adanya golongan ini yang bekerja siang malam untuk meruntuhkan agama; sedang pihak alim ulama janganlah patah hati untuk terus berjuang dan menyampaikan seruan Allah supaya umat sedar. Taburlah ilmu dengan tidak jemu-jemunya supaya agama jangan malap di negeri ini. Yakinlah bahawa perjuangan menegakkan kalimah Allah selagi alim ulama tegas berjihad, agama tidak akan mendung di tanah air kita ini.

Patah Tak Tumbuh – Hilang Tak Berganti

Seorang, lepas seorang alim ulama kita telah kembali ke *rahmat* Allah Ta‘ālā sesudah menunaikan kewajipan dan tanggungjawabnya berjihad pada jalan Allah, untuk menegakkan kalimah Tuhan. Allah akan memberi rahmat-Nya kepada sekalian mereka itu.

Di dalam beberapa tahun yang akhir-akhir ini beberapa orang alim ulama yang besar pengaruhnya telah meninggal dunia. Al-marhum al-Shaykh Tahir Jalaluddin telah kembali ke *rahmat* Allah Ta‘ālā sedang belum terlihat oleh kita ada orang yang mengantikan tempat al-marhum itu, sama ada dalam perjuangan menegakkan kalimah Tuhan dan di dalam ilmu.

Beliau diturut pula oleh al-marhum Tuan Haji Ibrahim Aqibi. Yang akhir ini tersiar pula berita kembali ke *rahmat* Allah Ta‘ālā seorang alim ulama besar dan banyak jasa dan pengaruhnya di Kelantan iaitu al-marhum Tuan Haji Abdullah

Bunut Payung. Seorang alim ulama besar dan banyak jihadnya menyedarkan umat.

Hilangnya alim ulama yang kuat jihadnya pada jalan Allah ini belum kita nampak ada gantinya. Masyarakat kita adalah rugi dan patut mencari mujahid-mujahid seperti itu. Mudah-mudahan Allah menimbulkan pula penyuluhan-penyuluhan di dalam agama-Nya supaya masyarakat tidak dapat disesatkan oleh pengertian-pengertian yang ditimbulkan oleh orang-orang munafik yang dijadikan alat oleh sesuatu anasir – Āmīn.



Bacalah!

Sudah terbit!

Buku-buku Syuhada

Disusun oleh:

Edrus

1. Ḥamzah bin ‘Abd al-Muṭalib	50 sen
2. Nusaybah – Pahlawan Wanita Islam	50 “
3. ‘Ikrimah bin Abū Jahl	50 “
4. Sa‘ad bin Rabī‘	50 “
5. Sa‘ad bin Mu‘ādh	50 “
6. Nu‘mān bin Maqrān	50 “
7. Ja‘far bin Abī Tālib	50 “
8. Anak ‘Abd Allāh bin Ubay	50 “
9. Anak Angkat Rasulullah	50 “
10. Abū Hudhayfah bin ‘Utbah	50 “

di-terbitkan oleh:

QALAM

356/358, GEYLANG ROAD,
SINGAPORE 14.